

Allannguutissatut siunnersuut

uunga

Uunga siunnersuut: Eqqissisimatitsisarneq aamma allatigut kulturikkut eriagisassanik kulturikkut kingornussatut illersuineq pillugu Inatsisartut inatsisaannik allanngortitsineq pillugu Inatsisartut inatsisaat nr. xx, xx. xxx 2018-imeersoq

Aappassaaniigassanngorlugu Naalakkersuisunit saqqummiunneqartoq.

Qulequttap nassuaataanut

1. Qulequttap nassuaataa ima oqaasertalerneqarpoq:

”(Nunami allanngutsaaliukkami Kalaallit Nunaata Avannaani aamma Kangiani illersuinermut aalajangersakkut sukannernerulersitat, illunik aserfallatsaaliineq iluarsaasarnerlu pillugit malittarisassani erseqqissaaneq aamma kulturikkut kingornussat sumiiffinni kulturikkut oqaluttuarisaanermut tunngasut inisisimaffigisaanni ingerlatat sunniutaasa nalilorsorneqartarneri)”

§ 1-imut

2. § 1, nr. 1-imi, § 5, imm. 1-imi oqaaseqatigiit pingajui ima oqaasertalerneqarput:

”Nunami allanngutsaaliukkami Kalaallit Nunaata Avannaani aamma Kangiani inussuit tamarmik aamma inussuit pillugit nunap allanngutsaaliukkap iluaniittut oqaluttuat eqqissisimatitaapput, ukiut qassit pineqarneri apeqquataatinnagit.”

3. § 1-imi nr. 2-mi § 5, imm. 4, ima oqaasertaqassaaq:

”Imm. 4. Nunami allanngutsaaliukkami Kalaallit Nunaata Avannaani aamma Kangiani sumiiffinnilu immikkut killilerlugit aalajangiunneqarsimasuni, Naalakkersuisut malittarisassiorsinnaapput qanoq nutaanngitsiginissaannik piumasaqaataasunik saneqqutsisinnaaneq imm. 1-imi pillugu, oqaaseqatigiinni siullerni aamma imm. 2-mi pineqartut pillugit.”

4. § 1-imi, nr. 3-mi § 6, imm. 4, ima oqaasertalerneqassaaq:

”Imm. 4. Nunami allanngutsaaliukkami Kalaallit Nunaata Avannaani aamma Kangiani ingerlatsisoqassanngilaq suliniutinik, qangarnitsat eriagisassat nunami imaaliallaannarlugit peerneqarsinnaanngitsut eqqaanni 100 meterinik ungasissusilik tikillugu.”

§ 2-mut

5. § 2 ima oqaasertalerneqassaaq:

” § 2. Inatsisartut inatsisaat una ullormi 1. juli 2019-imi atuutilissaaq.

Imm. 2 Inatsisartut inatsisaat una § 1, nr. 7 aamma 8 ullormi 1. januar 2020-mi atuutilissaaq.”

Siunnersummut nassuaatit

Oqaaseqaatit nalinginnaasut

Naalakkersuisut Kalaallit Nunaata Avannaarsuata Kangianiittup Nunap Allanngutsaaliukkap UNESCO-mi Man and Biosphere Programme-miit ilaajunnaarsinnissaanut aalajangiinerat tunngavigalugu allannguutissatut siunnersuut saqqummiunneqarpoq. Uumassuseqarfimmit UNESCO-mi Man and Biosphere Programme-miit ilaajunnaarnermi sumiiffiup siunissami nunatut allanngutsaaliukkatut taamaallaat taaneqartalernissa taamaammallu sumiiffiup ”Kalaallit Nunaata Avannaarsuata Kangianiittoq Nuna Allanngutsaaliugaq”-tut taaguuteqalissaq. Tamannalu siunnersuutip qulequtaata nassuaataata kiisalu siunnersummi § 1, nr. 1-ip, 2-p aamma 3-p allangortinneqarnissaat pisariaqalerpoq.

Aammattaaq siunnersuutip aappassaaneerneqarnissaata pingajussaaneerneqarnissaatalu UKA 2018- imiit UPA 2019-imut kinguartinneqarnerata kingunerisaanik § 2, imm. 1-ip atuutilerfissaa allanngortinneqassasoq siunnersuutigineqarsimavoq taamaammallu siunnersuut kingusinnerusukkut aatsaat akuerineqarsinnaassalluni. Peqatigitillugu aalajangersakkat uku tunngavigalugit malittarisassiortoqarneranut atatillugu piffissap pisariaqartinneqartup atorneqaannarnissaq ulakkeerniarlugu imm. 2-mi § 1, nr. 7-ip aamma 8-p atuutilernissaata 1. juli 2019-imiit 1. januar 2020-mut kinguartinneqarnissa siunnersuutigineqarpoq.

Siunnersummi aalajangersakkanut ataasiakkaanut oqaaseqaatit

Nr. 1-imut

Siunnersuutikkut ”Biosfære-qarfiusumiit” qulequttami nassuaatinit peerneqarpoq. Tamanna pillugu nalinginnaasumik nassuaatit innersuussutigineqarput.

Nr. 2-miit 4-mut

§ 5-imi imm. 1-imi oqaaseqatigiit pingajuanni aamma § 5-imi imm. 4-mi kiisalu § 6, imm. 4-mi ”Biosfære-qarfik”-mik oqaasertalerneqarsimasut siunnersuutikkut peerneqarput. Tamanna pillugu nalinginnaasumik nassuaatit innersuussutigineqarput.

Nr. 5-imut

Inatsisartut inatsisaata atuutilernissaa 1. januar 2019-imiit 1. juli 2019-imut siunnersuutikkut allanngortinneqarpoq. Peqatigittillugu § 1-imi nr. 7-ip aamma 8-p atuutilernissaat 1. juli 2019-imiit 1. januar 2020-mut allanngortinneqarput.

Tamanna pillugu nalinginnaasumik nassuaatit innersuussutigineqarput.